

CONSILIUM,  
quod

Pro redintegrando

POLONORUM  
REGNO

Amicorum integerrimo

*intimabat*

HUSANES DE GEMLABBURBITS  
GEMLABBURBITSKY.

[1699]

Co. XVIII of

THE UNIVERSITY OF  
THE STATE OF NEW YORK  
THE STATE ENGINEERING SCHOOL  
SARASOTA, FLORIDA





**Q**uæro adhucdum in Polonia Poloniam. Reginæ fata nondum calamitatis peperere fata. Defuncta prosperitas nondum reviviscit, nec viva emoritur miseria. Sarmatia luos adhuc patitur manes. Nullus non quidem indubitata lebatur spe, fore ut Reginæ mors, mortem generaret factionum, quæ à tot trucibus bellis lacerum regnum, etiam post almam cum exteris initam pacem, in diversas scindere partes, ac extremæ ruinæ tradere nefario nisu satègère; sed nidus omnis adhuc cernitur mali. Fœdâ labe infecta vix respirare valet. Nullus artus Gallici exors morbi, qui nisi tollatur ante, quàm ad iliorum intima, & ad vitæ principium penetret, de tota corporis machina, ac eleganti quondam structura actum fore, credendum est. Squalidi latices ante omnia eliminandi, vel per Emetica & Cathartica, vel per insensibilem transpirationem. Medendi methodica ratio quidem suaderet inveterato & tenaci huic humori violentiam opponere, nisi corporis ob imbecillitatem, motus violentus judicaretur periculosus, & natura malo assueta repente si eo privatur, concidere non labefactari duntaxat solet. Si enim vis adhiberetur Emetica, uno impetu factio esset ejicienda Gallica, quæ huic quondam apprimè sano corpori tot turbas dedit, totque causavit convulsiones & anfractuosos ipsamos. Sed præceptis hæcce violentia haud est periculi experta, cum Gallicus hic morbus symptomatum syndromen sibi habeat comitem. Tartara Colacica bulimia unde Polono reddita familiaris? à Gallo. Quis Moschorum plicâ devenustavit Poloniam? Gallus. Quis Suecorum Icorbuto dedit originem? Gallus. Lue Pannonicâ Sarmatiam quis infecit? Gallus. Quis querqueram arthritidem cum Colica in Polonia reddidit Epidemicam? Gallus. Quis Turcici Maslach esum invexit? Gallus. Quis tandem omnem massam sanguineam abominando contagio morbi inquinavit Gallici? Gallus. Nec contentus Gallus corpus infestare, animam quoque nescio quâ Circæa Metamorphosi dedecorare satègit. Ingens porcorum, ursorum, luporum, vulpium & accipitrum reperitur caterva. Non pauci ceu loto saturi, libertatis pristinae immemores Gallicæ se mancipare gestiunt servituti. Generosæ animæ locum occu-



pavit fervilis. Sicut Troës Troës; ita Poloni fuère Poloni. Anima principem suam facultatem auro cessit Gallico, cui turpiter parere haud erubescit, amplius ratiocinari ignara, libertatem esse servitute potiorrem, & Poloni proprium esse Gallum averfari. Sarmaticum solum Gallicum eructare Liliū, illudque non fragrantia recreare, sed foetore infestare Polonorum nares, profugus ex hoc Regno quondam docuit ille Andegavensis Henricus, ut & defuncta Regina, quæ nauseam semper, quia eam ad eructandam non satis robusta natura, ciebat. Sunt duo incompatibilia Gallus & Polonus, hic libertatis, ille servitutis amans. Gallus imperare gestit, & Polonus servire nescit. Nullum imperium, quod absolutum vult Gallus, tolerare potest Polonus. Princeps Galli cura libertate in frangenda, Poloni in servanda. Monarchiam universalem meditans, ideam suæ impiæ potentiaë auspicaretur in Polonia. Mancipia tractare luctus, ingenuos nisi offendere nescit. Iisdem avaris manibus, quas modo injustissimè in Flandriam extendit, adunioribus forsitan unguibus munitis in Poloniam sæviret. Harpyarum partus est relictus, &

Tristius haud illo monstrum, nec sævior ulla

Pestis & ira Deūm, stygiis sese extulit undis:

Tantum hominum vultus portant, fœdissima ventris

Ingluvies, unæque manus & pallida semper

Ora fame.

Quoties Gallus cantat, toties Petrum imitari, pœnitentiamque meditari debet Polonus, ac precibus Cœlum sollicitare, quo Gallico à morbo immunis existat. Nunquam felicitatem Polono dedit Gallus, Cometæ instar semper fuit, non nisi infausta apportantis. Quid fortunæ exanimis pepererit, rudera loquuntur. Infelicissima in hoc duntaxat felix, quod post mortem etiam miraculosè parturiat, sed monstrosa infecta, omnem salutis florem depalcentia. Sarmaticus aquila Liliū sub umbra neutiquam quiescere amat, nec refocillatio speranda ubi umbra nulla, præterquam quod Liliū vanè superbiat & pomposè se ostendet, habet nihil. Anima, inquam, Polonici corporis læsa. Comercia, quæ Rerump. anima, corrupta, introductâ novâ illâ monetâ, quæ plus nocuementi, quàm quotquot fuère hostes, intulit. Cuprea est, ut indicet, aureo relegato seculo, introductum cupreum, & exterminatâ aureâ libertate, introductam esse cupreâ servitutem, cujus specimen jam



exhibitum, in, ad macellum deductis tot Proceribus & Nobilibus. Evidentissimum est, à Polonici corporis contaminatione, contagium & animæ esse affricatum, quæ non, nisi eo restituto, sanari potest. Restitui autē nequit, nisi pravi & peccantes exhauriuntur humores. Hos autem violento exturbare medicamine est inconsultū, cū sic corporis structura nimis alteraretur, perturbaretur, & conquassaretur. Lenissimum medicamentum semper tutissimum. Factio Gallica quidem ut vi exorta, ita & vi annihilari deberet; sed multa sic perirent membra, quæ facta tecta vult Polonia. Quid ergo remedii, pestifero quod huic proportionatum morbo? Insensibilem forsitan per transpirationem cispellendos esse humores ais: sed quomodo? Semotionem forte Regis à throno suades? Non, abhorret enim Polonicus genius violento à tali remedio, & ab improba hujusmodi tyrannide. Germania quidem, cui eadem quæ Reip. Polonicæ facies, hanc deponendi rationem in Wenceslao & Adolpho Nassoviensi exercuit, principio nisa: Ejus esse deponere, cujus est eligere, & habentem jus conferendi, habere etiam destituendi. Verūm ut hæc ad speciem magis, quàm ad usum dicuntur, ita illa potentia & actus depositionis non fuit analogus, sed anomalus, nec non nisi turbato rerum, & naturæ ordine contigit. Non enim Rex postulatur ut Medicus, cujus imperia durant, quamdiu placet ægroto. Hinc rectè Valerianus Imperator ad Prætorianos: Ut me ad imperium eligeritis in vestra erat potestate, sed postquam electus sum, non vestro, sed meo parentis necesse est, arbitrio. Rex noster optimus, nulli errori, multo minus crimini obnoxius, potius duplex diadema, quàm unius meretur privationem. Fatcibus Imperii moderandis adhuc par, & in vivido ætatis articulo constitutus, nihil nisi reiterandas meditari debet nuptias, quæ solæ præsentissimum medicamen, quod radicatis morbi Gallici viribus opponi potest, hoc *ἀνώγει νότος*, insensibiliter tamen rancidos exturbabit latices. Longè aptissimum, nec non consultissimum matrimonii fuisset tœdus, cum Danorum Regis filiarum una, nisi occasio illud ineundi jam esset amissa. Obstaculi nihil Lutheranismus, cui Dania addicta, dedisset, cum Poloniæ interfit diversas tolerare religiones, hæc, quamdiu viguère, inconcussam servâre Rempublicam, & quibus excisis, omnis fuit exul salus. Sacrorum libertas florentes reddit Respublicas. Percurramus omnes & visuri sumus tantum in-



columes, & in culmine felicitatis sedentes eas, quæ sacris diversis concedunt hospitia. Religionum si schisma Reip. furaretur incolumitatem, sanè Stephanorum, Sigismundorum & Uladislaorum, illud tolerantia secula infaustissima fuissent; sed ipsa beatitudine beatiora Casimirianum seculum nominant infaustum & infelicissimum, quod ignis ferrique truculenta diritate Romana ab Ecclesia discrepantes persequi allaborat. Stolidissimum est illud toxicum credere, quod alii non dissimili morbo laborantes pro antidoto habent. Baraviam, dissonantia sacra, sacram faciunt, quam non paucæ imitari satagunt Resp. Otomannicus Cerberus sui regiminis nunquam firmamentum haberet tam solidum, nisi nullis non religionibus daret locum. Commercia & negotiationes ex diversarum religionum anima, suam trahunt vitam. Si vis Reip. salutem, floreat fac commercia; Si hæc aves, non tantum perfer, sed & diversa allice, imò attrahe numina. Hæreticorum titulo multi insigniuntur à multis, sed nescientibus veram hæretici definitionem. Si Augustinum Sarmatia audivisset, qui, Epistola centesima sexagesima secunda, & in libro de utilitate credendi, Hæreticum illum nuncupat, qui alicujus temporalis commodi & maximè gloriæ principatusque sui gratia, falsas ac novas opiniones vel gignit vel sequitur, sane Arrianos non extorres fecisset, qui non principatûs cupiditate tanquam hæresium matre diversas sectantur opiniones, sed mera mentis caligine piâ commiseratione digna. Passionum nisi Polonia fuisset mancipium, Salviano de Arianis ita loquenti aurem præbuisset:

„Hæretici sunt, sed non scientes: denique apud nos sunt hæretici,  
 „apud se non sunt: nam in tantum se Catholicos esse judicant, ut nos  
 „iplos titulo hæreticæ pravitatis infament. Quod ergo illi nobis sunt,  
 „& hoc nos illis. Nos illos injuriam divinæ generationi facere certi sumus,  
 „quod minorem patre filium dicant. Illi nos injuriosos patri existimant,  
 „quod æquales esse credamus. Veritas apud nos est, sed illi apud se esse præsumunt.  
 „Honos Dei apud nos est, sed illi hoc arbitrantur honorem divinitatis quod credunt. Inofficiosi sunt, sed illis hoc est summum religionis officium. Impii sunt, sed hoc putant veram esse pietatem.  
 „Errant ergo, sed bono animo errant, non odio, sed affectu Dei, honorare se Dominum, atque amare credentes. Quamvis non habeant rectam fidem, illi tamen hoc perfectam Dei æstimant



„mant caritatem, & qualiter pro hoc ipso falsæ opinionis errore in die  
 „iudicii puniendi sint, nemo potest scire nisi iudex. Interim idcirco  
 „eis, ut reor, patientiam Deus commodat, quia videt eos etsi non re-  
 „ctè credere, affectu tamen piæ opinionis errare. Etsi Iudæorum cæ-  
 „tui sua datur devotio libera & non impedita, utique quæ neque statûs  
 „rationi, nec ecclesiastico gregi quicquam derogat emolumentum, cur  
 „non idem indulgendum Arianis privilegium & immunitas? Sectæ o-  
 „mnes quæ virtutem præstant, nec publicæ incommodant tranquill-  
 „tati, sua gaudere debent libertate, qualis & Judaica, de qua Augusti-  
 „num dixisse, Philo in legatione, & in libro de sacrificantibus, commemo-  
 „rat: non eorum conventus bachanalia esse, aut cætus turbandæ pa-  
 „ci, sed virtutum scholas. Qui in tales sæviunt ipsi in ea causa sunt, ut pu-  
 „niri justè possint, cui sententiæ & Sanctus Thomas subscribere non ve-  
 „retur. Polonia tamen susque deque habita hæc sapientum bigâ, quam 2. 2. I. c. 8.  
 „tamen pro orthodoxis habere, & cuius dogmata pro regula obser-  
 „vare sese jactitat, Judæos stygio odio prosequitur, & Arianos extermina-  
 „tos voluit. Quod Agathias de Alemannorum absurdis superstitioni-  
 „bus sensit, hoc de Arianis & de cunctis quos errare arbitrantur sentire Hist. 10.  
 „deberent, cujus verba verè aurea & mentem verè piam apponere non  
 „dubito: Miseratione quàm odio digniores sunt, ac tales quibus igno-  
 „sci par sit, quicumque à vero aberrant. Neque enim volentes palantur,  
 „& cæspitant, sed cum bonum appetunt, in judicando decepti, quæ se-  
 „mel visa sunt retinent mordicus, qualiacunque ea fuerint. Ethnici  
 „dissonas à sua devotione religiones semper æquo tulère animo, testi-  
 „bus annalium monumentis, & Christiani suos confratres, quos Chri-  
 „stianos appellare tenentur, eliminant, non considerantes, Christianos  
 „non esse Christianos, nisi opera Christianismi elucescant; Sed quæ hic  
 „fidei opera? Loco amoris nihil nisi odium, loco misericordiæ nihil ni-  
 „si persecutio, loco ballami præter ferrum nihil. Quis ergo negare au-  
 „deat, Christianos & quidem Catholicos, omnes paganos impietate &  
 „præpostera religionis prænsatione longe superare? Ora nostrorum Po-  
 „lonorum semper religionis voce tument & spumant, in rei veritate  
 „tamen ignorant quid sit Religio; Hanc nihil aliud esse ajunt, quàm  
 „rigidam ceremoniarum, rituum & traditionum à Conciliis & Ponti-  
 „ficibus institutarum observantia, quæ tamen sæpenumero ita absurda,  
 „ut &



ut & ab Ethnicis refutari queat, ut à Numa, quī, Plutarcho teste, ideo simulachra de templis sustulerit: Quod Deus concipi nisi sola mente nō possit. Et Judæi tales Christianos rubore suffundunt, qui verissimè dicunt quid sit Religio, videlicet, *ad Deum accessus*. Et revera vera religio nō consistit in antiquæ Ecclesiæ stolidâ observantia, sed incōformitate mentis & vitæ meæ ad Dei voluntatem; quo magis homo se ab homine divellit, & se Deo unit & aptat, eò propior veram ad religionem pervenit. Nihil magis confunditur quàm credere cum Scire, & fides cum opinione, ut & religio cum rituum observantia. Multi imò maxima hominum pars arbitrat se credere, cum fidei suæ articulos sciat, sed scire illud non reddit Christianum, nisi adjungatur illud credere, quod in vera Trinitatis agnitione, ac pia consistit vita. Religio quæ præter vanam opinionem nihil (intelligo eam quæ Polonorum mentes hodiè occupavit) & quæ potius chymæricum, quàm hominum mentibus verum infudit zelum, Polonis est curæ, & religiosa vitæ ratio nulli est cordi. Religio si Catholica capit incrementum, cum bonæ vitæ decremento, tunc unanimis opinio circa sacra, & nullum pietatis exercitium desideratur. Benè victurus crede beatam ad vitam pertinentia, quatenus sacro in Codice manifestata, & ita verissimam te nactum esse religionem scias. Cognoscere ac incomprehensibilem in Trinitatem credere vitam ad æternam sufficit, piæ tamen vitæ accessu. Multum de religione garrere est multum insanire. In homine quantum salis quoties expiscari beatus noster satagebat Uladislaus, toties de religione ordiebatur discursum, examinâdus rigidus si defensor, pro delirante habebatur hocce ornat<sup>o</sup> encomio: Rudentem audi vi Asinum. Et revera Principem Virum ad eò devenustat nihil, quàm de religione sermo. Si Princeps, cujus lingua exercitui gubernando vel tribunali administrando dicari debet, de religione blaterat, idem ornamentum capit, quod ex muscarum venatione Domitianus. Non refragor opinioni, Religionem esse Rerump, tutricem, veræ politiæ gubernatricem, ac virtutem actionum Principis moderatricem. Exulem tantum cupio Religionem superstitiosam, timidam, scrupulosam & opinionem salvifica pro fide venditantem, nec minus detestor artificiosam, fucatam, aras frequenter manibus fatigantem, quæ tamen merentur post terga ligari. Cave alia sit religio in conclavi, alia in templo, Principis est humilem esse erga Deum sine abjectione, & timidum cum generositate in qua prudentum consistit timor.



Summa in devotione nunquam non magnanimitatis tinctura, profapiae suae  
 sublimitatem monstrans promicare debet. Ut ingenuè animi explicem  
 sentia: Principibus non minus quàm plebi devotionis competit ardor, & ca-  
 put coronatum submissione erga Deum magis coronatur, devotio tamen  
 Principum fidelem habeat pedisequam magnificentiam pomposumque appa-  
 ratum necesse est, quippe coronatorum capitum submissio ipsa in humilia-  
 tione dignitatis præ se fert jubar, quo cæteri destituuntur. Ignis quo Deus mon-  
 tem accendebat quondam alterius fuit naturæ, quàm qui in vallibus humida ale-  
 batur pinguedine, & majestiosa palmi submissio plus, fragrans quàm rosetum  
 arridet Cælo. Devotum volo non superstitiosum Regem. Piam desidero non  
 stolidè Romano-Catholicam Sarmatiam. Sinito ô Polonia! quemlibet suo ab-  
 undare genio & sua gaudere religione, seu potius opinione, & videbis Te fore  
 beatam. Credas absolutissimè nec Te nec Romanam Ecclesiam capacem esse  
 judicandi, utrum tua an Augustana sit verior religio, nec Tuum ultra beati  
 Chrysostomi iudicium extendas, qui homilia contra anathematizantes clarissi-  
 mè confitetur, nullum mortalium tanti esse iudicii, qui veritatem dissidentes  
 inter religiones agnoscere valeat, En ejus verba: Id quod absconditum, solus,  
 sine periculo dijudicet seculorum iudex, cui soli patet & scientiæ mensura &  
 fidei quantitas. Unde enim nos sciamus, dic mihi quæso, in omnibus ejus men-  
 tem? cum Zosimo quanquam pagano hoc tantum dico: Christianæ fidei hæc  
 est pollicitatio, libertas ab omni crimine atque impietate. Sed nimis circa sa-  
 crorum montium saltus sum palatus. Quid si tertiam Daniæ Principem nostro  
 suaderem Regi, regiis instructissimam virtutibus? Est juvenis & thoro aptissi-  
 ma, tam ratione ætatis, quàm fertilitatis; spes enim est, eam non à matre Regina  
 degeneraturam, sed eadem fecunditate Regnum beaturam; Aquilo benè A-  
 quiloni, sed perperam Orienti jungitur. Cæteras inter Principes Regi oblatas,  
 & circa quas liberum non eo ligatum arbitrium, ut Curlandicam, Moscoviticam  
 & adhuc innominatam Gallicam, palmam ducere cerno Danicam. Hæc unica  
 est quæ Poloniæ pessundatæ manus porrigere valet, & non Elconora Mantua-  
 na Ferdinandi Tertii Imperatoris relicta vidua; nec ex hoc conjugio satæ Prin-  
 cipes ut Teresia Maria Josepha annos ferè quindecim nata, & Eleonora Ma-  
 ria Josepha quatuordecim ferè annorum Princeps. Danica sola par est redden-  
 dis amicis, Patriæ ex hostibus, non Claudia Felicitas Ferdinandi Caroli Austriae  
 Archiducis Oenipontini defuncti annos quatuordecim nata, ex Anna Medi-  
 cæa, filia multo minus Anna Maria Josepha, Philippi Wilhelmi Ducis Palatini  
 Neoburgici ex Elisabetha Emilia Hassiaca genita filia, annis nondum plene nu-  
 billis. Certare quidem videtur Maria Hedwig Augustæ filia Christiani Augu-  
 sti Ducis Palatini Sultzbacensis, ex Emilia Nassoviensi nata annos ante octo-  
 decim ferè, cum Danica, nisi infausta æstimanda & verendum ut eadem forte  
 affligeret Poloniam, quæ Austriam ante biennium, cum matrimonii fidem



Sigismundo Francisco ultimo Austriae Archiduci dedisset, affligeret. Danica prævalet, quæ factioni Gallicæ, cujus robur sine Suecorum, nullum, resistere est potens unica. Si Suecos lubido, Poloniae insultandi, prurit, cum Holfatiæ Duce Danus, quo cum arctissimum, Suecis explosis, initum fœdus, illos refranabit, Germaniæque exuet terris, præprimis si eadem, quæ à Dano cum Electore Brandenburgico, Ducibus Brunsvicensibus, ac Batavis icta fœdera, à Polonis panguntur, adjunctis Moschorum viribus, quæ à Dano non leve nanciscentur incrementum, si commercii sui indulgeatur vigor. Hocce matrimonium sanctâ Polonos beare valet pace. Non cantavit Gallus novam ceu contra tempestatem, seu nocivam mutationem, nullâ invidiâ vel zelotypiâ, nisi stolidè ferocire velit, excitatus. Daniæ Princeps, quæ virtutis icon, & absolutum perfectionis opus, nulli Principi Gallia cedere potest, imò nec unam tota nutrit Gallia, quæ huic æquiparanda. Sub eodem ferè Dania & Sarmatia climate, longè simillima fovent ingenia. Idem aer, ejus Oceanus parens, eandem instillat indolem. Eandem, quam Poloni, spirant auram Dani. Distantiam, quam Mare facit Balticum, nullam animorum distantiam inducere, credibile est. Eadem Elementa eandem pariunt naturam, hinc eadem apud utrumque tam longos per annos mansit, viguitque libertas. Non ovum ovo magis simile, quàm indoles Danica Polonicæ, ita ut Sarmatia non opus habeat præliari cum Gallica levitate & petulantia, quæ gravitati ejus & generositati profus contraria. In elocandis filiabus semper faustissimam vidit Daniam Germania cum Anglia, cujus felicitatis nexus, durante nexu Danico, nunquam fuit solatus. Nec est quod de dotis vilitate formetur scrupulus, tantam enim, quantam Germanorum nulla est apportatura. Dos ubiq; est limitata, exigua & ferè nulla apud nullos non Principes. Gallus immensas gazas cucurrit, & de ingenti dote suas facit gracillare Gallinas, sed præter inanem, nihil sentitur, sonum, & si aliquis fulgor fulgeat, nihil est nisi aureus imber, quo alter ceu Jupiter nostræ libertatis Danaen devirginare diligit, non obstantibus tot Acrisis. Si Jagellonica transplantatur stirps, incomparandâ Sarmatiam beavit dote, si pax, affatim apportatur dotis. Hæc pacis erit filia, hæc vita familiæ, hæc salutis Regina. Aquilo aquilas dabit, suis sibi placeat cum gallinis, Gallus, qui strepere licet vellet, nequit, cernens conjugium, suam ambitionem neutiquam feriens impiam, improbam. Nec Cæsaris limi timendi oculi, qui nulli, excepto Gallo & Sueco, invidi apparent. Optaret quidem Sorori cum Lotharingiæ Duce sceptrum, sed si titubans illud semper factione futurum Gallicâ considerabit, cessabit hic intemperans pruritus, prælaturus Sarmatiæ pacem suo honori ac incremento ficulneo. Res est clara, nullum matrimonium, hocce Danico, Reip. Polonicæ plus fore proficuum. Ast profectior Regis ætas, viduitatisque certitudo Dano est motura scrupulum, non amaturo filiam suam tam lubrico fortunæ niti fundamento. Verum & huic nausæ medicamen præsto, si Rex universa cum



Rep. sanctissime pollicetur, Regnam, si mascula beatur prole, toto viduitatis tempore Regni moderaturam, fasces, Regisque vices, non aliter ac Suecia Regina, obituram: Sia verò improlis maneat Vidua futuro Regi nupturam, quo, genus inter humanum, nullus Principe Neoburgico Palatino aptior, digniorque, utpote qui quasi arboris Jagellonica superstes adhuc surculus. Nec est quod verearis, annorum ob inæqualitatem, Regis periculum, tali à thori socia. Non lascivus, sed pius à Dania promittitur amor; pietas amori nupta nefando à tali molimine abhorret, & peccare me confiteor, quod non erubescam de hujusmodi divinitatis caractere & virtutis simulacro tam impias fovere cogitationes, & tacite in suspicionem rapere hoc pietatis templum, quasi ejus interiora colubrorum nidus. Hanc sibi electam eat Rex in vivo adhuc vigore constitutus. Hæc Jagellonica arbori effætæ & marcidæ ferè, infinitos est largitura surculos & ramos, ut eorum sub umbra, atra, ab infortunii ardore, Sarmatia se solari ac refocillari queat, spirantibus prosperitatis etefis. Hæc Regiâ stirpe fata, & auctoritatem & amorem sibi est conciliatura, quo Domus Austriaca cum Moscovia Vatinianum, quod erga eas alitur, ob odium, destituetur. Meliorem, digniorem, tranquillitati que introducendæ aptiorem nullam alit Europa Principissam, Domus Austriaca, præter quod leges, Legislatore tunc Samoscio, quondam sanctæ illam arceant, pabulum factioni Gallicæ & sic infastæ præberet Bellonæ, quam eliminatam optat Polonus, & ex qua nulla salus. Ex Gallia eadem malorum Lerna speranda, quæ Domum Austriacam ad novæ factionis machinationem incitaret, cujus insigne specimen jam Baro de Isola in Polonia exhibuit, metu enormis potentia quæ nulli non vicino merito jure suspecta, cui non difficulter manum præberet auxiliatricem Polonus, qui Gallicæ dominationis pertæsus, nihil plus, quam quod Gallicum abominatur, detestatur, execratur, factâ inductione, quod nulli non Regno, nulli non Principi, matrimonium Gallicum fuerit nocivum ac pestiferum. Britannia suas cicatrices nondum ex Gallico conjugio cernit sanatas nedum deletas. Quid Austriaca Domus emolumentum exinde hauserit quondam, annales loquuntur. Quid fructus capit Dux Megapolitanus? suspiria, deliria. De Portugallo & Sabaudia quid futurum duce, per breves visurus. Et Polonia exemplum omnium instar horrorem injiciet, ne sincera Germania, generosave Sarmatia quicquam habeant commercii cum hujusmodi Clytemnestris ac Messalinis, quæ illud prostituere pro libertate, & fidei violationem pro prudentia vel dexteritate habent. Nuptiæ Gallicæ, nuptias servitutis sunt daturæ Polono, non aliter ac Ruthenicæ quæ nihil, nisi suum Sarmatiæ optant jugum. Curlandica quæ quasi Polonica & Nobilitati parum vel nihil inæqualis, non aliter ac Radziviliana, certas ob rationes, quæ Sigismundo Radzivilianam in matrimonium collocanti objectæ, à thoro Regis excluditur, & si has non moraremur, Regis post fata omnis auctoritatis exors viveret, & sibi & Regno extremam



partura pernitenti. Neoburgica per se exclusa, quia damnata ut Fratri olim Coronam concedat, ita ut cunctis ad examen vocatis nulla à Cælo Sarmaticum ad diadema destinata, quam Danica Princeps videatur.

Non nescio à non paucis Coronæ depositionem Regi suaderi, exemplo immortalis Christinæ & Caroli Quinti. Non eo quidem inficias decumanos à Casimiro esse exantlatos labores, regimen concatenatum fuisse bellum, diademaq; spinis septum, usq; eo ut tali sub onere lassus, dulcem præter tranquillitatem aveat nihil; Ast pensiculatius trutinandum gravitatem Imperij obedientiæ pondere longè esse minorem, & laborem gubernandi auscultandi onere esse inferiorem. Regnandi pruritus hominum in mentibus ita grandis, potens, & immensus est, ut nihil loci nec rationi, nec legibus, nec pietati maneat superstes, evidensq; est cunctis ex, dominio excepto, rebus resultare fastidium. Si omnes qui naufeaverunt Imperium haud sat ingenii nec cognitionis ejus habuerunt; est quippe impossibile ut perfecta cognitio boni, quod ex regimine redundat, stultam concedat resignationem. Imperium calamitosâ licet sit miseriam circumvallatum, aut propter gloriam possidentium & curarum multitudinem, aut propter malignitatem invidorum: attamen nihil in eo tam periculosum ac miserabile continetur, ac in servitute. Qui insudat, & legum sacra regnandi cupidine violare non dubitat tantum propterea, ut sceptrum deinde turpiter deponat, aut est mentis impos, aut caret illud moderandi dexteritate, aut non sat habeat ingenij magnificentiam ejus cognoscendi. Dominium ita nostræ est conforme naturæ, ut ab illo nullus abhorreere queat, nisi ab humanitatis degeneraverit idea, quæ ambitionem introduxit illud potius hianti capeffendi ore, quàm degeneri metu vel molli desidîâ deponendi. Et revera, qui renuit regnare, meretur servire. Verum est dominij perdendi metum, illud deponendi præbere posse consilium: Major quippe prudentia est, illud relinquere quod retineri queat ante, quàm amittitur; Ast vilissima temeritas est, vinci à timore, quando in medio adhuc sedetur altitudinis. Cui adhuc sat se defendendi virium, is dignitati, sine inelictæ famæ jactura, renuntiare haud debet; Polonia nondum usque eo attrita, quin spes se se conservandi, metum perdi longè exsuperet. Consideret, quæso, Tua Maj. Regis esse, fortuna & in sinistra & in prospera subditis præesse auxilio, & infra Regis dignitatem esse, discrimine in exiguo deserere suos. Injurius es, Sereniss. Rex, æque in Te ac in nos, & Tuæ familiæ indelebile inuris stigma, si propter delitiosum, quod prætendis, otium, Patriæ Patris exuis genium, & nos miseros auxiliatricibus tuis orbas manibus. Pro vecordi ab omni habeberis mundo, proque minus virtuoso. Qui enim nimis suam timet fortunam, is prorsus suæ diffidit virtuti: Ignominiosum foret audire & increpari fortunam, Tuæ injecisse Virtuti, metum, & heroicam generositatem, quæ semper strenuæ fortitudini maricata fuit à timore esse victam. Vilitas hujus actionis, plusquam Impera-



peratoriam expeditionem ultimam, quâ Moscoviam exanimem fere reddidisti, & præprimis quam monstrasti intrepidam ac nullo periculo concutiendam mentem, assultu in Gluchoviensi, cujus hi mei oculi testes, obscurabis, annihilabis. Deniq; si nulla contra metum medela, extrema & ultimum fortunæ præstoleris, quæso, punctum, satius enim longè est præcipitari, quàm descendere à dignitatis & domini cacumine; Malum quippe quò brevius, eò minus sensibile, & si cadendum est è Cælo cecidisse velim. Sine anchora, velis, & antenna sæpissimè quondam fluctuata Sarmatiæ navis, nec tamen prorsus quassata, sed semper suum est sortita portum. Navarcham Te præbeas, Screniss. & si unus tanto non par es periculo ac tempestati, peritum eligas nauclerum, quem Tibi fortis & fidelis suppeditabit Germania. Non equidem Polonia Heroum adeo inops, ut nullus Nobilium huic oneri non impar reperiat, sed paritas generis parendi excludit promptitudinem, fatatq; confusionum tricas, insolentiæ proterviam, & procacem, omnis mali matrem *Licentiam*, quæ Sarmatiam adeo hiulcam, eadaverosam, ac ferè emortuam reddidit. Indigenæ denegatur respectus, qui omnem in militia absolvit paginam, nec fides ei adhibetur, specimine etiam affatim exhibito, quod exactè militarem calleat disciplinam; Alienigenæ verò, præsertim ex antiquissima Principum, profapia creto, debitus dabitur honor, reverentia, obedientia atque fiducia, quæ unicum, imperantem ac obsequentem inter, fundamentum, firmamentum. Hactenus de Polonis, quod Cæsar Germanicus de Germanis effabatur, asserere licitum fuit: *Visu vos, sine pudore flagitij, sine cura Ducum, abire, fugere.* Sueci, quod Romani milites, qui sub Silio rebellantes in Gallos tendebant, de Polonis sunt professi, se *expetere, ut videant modo hostes adversos, & afficiant, nam id satis ad victoriam futurum.* Unde verò talis degener Polonorum ortus animus? Certè strenui Ducis ex defectu. Memores si fuissent Poloni Chabriæ effati: *Exercitum Cervorum meliorem esse Duce Leone, quàm exercitum Leonum, duce cervo.* Et Demadis, qui defuncto Alexandro M. exercitum Macedonum Cyclopi excæcato adæquavit. Sanè non tantum scrupuli habuissent in eligendo Archistratego etiam extero. Nec est quod objicias, hocce consiliam introducendorum peregrinorum legibus adversari fundamentalibus; Verum leges temporis, non tempus legibus accommodandum. Altera curia, altera curæ. Necessitas est legum exors. Prisca si secula modernam Reip. vidissent faciem, non ablonas ab hocce consilio condidissent leges. Leges benignâ accipiendæ interpretatione, ut casus summæ necessitatis excludant, tum demum vim habent obligandi, cum latæ sunt ad Reipubl. emolumentum, non si onus injungant, quod à commo abhorreat. Et leges quæ malum majus aut certius evitant, magis utiles quàm periculosa etiam publico censerì debent, quia minus malum rationem induit boni. Nec rationi consonum est nobis hoc esse noxium quod aliis proficuum.

Tacit. 2.  
14. 5.Tacit. 3.  
45. 2.Plut. a-  
pophitic.  
66.Id. Cap. 43.  
ib.



Cum Venetis Batavia non dubitat peregrinis integrum concedere exercitum. Vix ulla, felici præliatura Marte, Resp. vel Regnum reperitur Germanorum ope absque. Nonne nostra Resp. Germanorum auxilio fœdissimam in fugam vertit Ottomannicum Cerberum, Rutenicumq; Draconem? Bauditio Germano Duce semper triumphatrix visa fuit Polonia. Pro oraculo sit Polonis dictum: Sine Germanis hostes non iri expugnatum, & à Germanorum lacertis Sarmaticam sperandam esse tranquillitatem. Smolenscum, qui quondam, cepit, & nunc cupiat; fac Germanum obsessorem, per brevi & illum visurus es possessorem. Non absolutum peregrini suadeo imperium, sed limitatum, à Rege & Rep. tuas capiat leges, & imperandi circumscribatur arbitrium, sic nullum abs eo timendum periculum, sed potius dulce Regis expectandum otium, & tutum Reip. levamen solamenque. Dux Würtembergiæ Ulricus hanc optimè obiret Spartam, nisi decrepitam ob ætatem fere elumbis, duris laboribus exantlandis inidoneus, & cōstatis animi exors, cuius specimē religionis improvida exhibuit mutatio. Badensis Marchio Catholicus vices hujus supplere posset, nisi à tali functione nimis vasta corporis moles ipsum arceret, ita ut inter ingentem Principum Germanorum farraginem binos duntaxat reperiam aptissimos, Principem Palatinum Philippum de Sultzbach, & Georgium Christianum Hassiæ Landgravium. Prior bellicosissimus, & militaris disciplina peritissimus; sed præter quod Augustanæ confessionis sectator; hostis Poloniæ olim acerrimus fuit, & tyrannicè nostra in viscera sævit, ita ut Polonicus genius, qui ut generosus, ita vindictæ avidus, omnem ei derogaret amorem, detrectaret obedientiæ debitum, ac pro infensissimo & truci declararet hostem. Nec unquam ipsi favit fortuna, sed Martem semper est expertus contrarium, ut in clade Ozenstichoviæ & Fioniæ. Posterior huic palmam præripere videtur, qui teneris ab annis, tormentorum inter tonitrua, & bombardarum boatum in campo nutritus, à Bellona lactatus, & à Marte informatus; Non melius imperare quàm parere didicit; Ipse est expertus quid sit gregarius miles, & supremus Campi-Dux, cujus strenuam dexteritatem nuper Monasteriensis probavit Episcopus, & cujus fortitudinis sunt admiratores Batavi. Variarum gentium genium & ingenium callet, non sine exacta earum linguarum peritia. In Flandria exhibita strenuæ velitationis tyrocinia adhuc exofculatur Hispania, quæ, eum per biennium fere, sua inter brachia fovit tenerrime, sine ulla, concedendorum Aulæ arcanorum, diffidentia, ita ut Zelotypo Gallo nihil prius nec antiquius fuerit, quàm eum suas in partes nullis non illecebris trahere, summisque honoribus ac muneribus mulctare. Quanti Italia, & præprimis Cæsaris ipsum æstimet aula, encomio plenæ testantur voces, non tam ob antiquissimam & illustrissimam prosapiam, quam si non à Tuistone & Manno, certè tamen ab Arminio, seu nobili Marobodui & Tudri genere derivare potest, quàm virtutem & raras naturæ dotes, quæ *Carorum, qui penes initia pugnarunt o-*



*mnium locabantur*, Heroicas adhuc sapiunt reliquias. Proficius & apprimè ne- M.G. 31. 4.  
 cessarius hujusmodi Poloniae Princeps, fidelis Romanae Ecclesiae est alumnus,  
 & maximae fidei Europae apud Principes, quae foederibus in fanciendis, auxilio-  
 que implorando absolutissimum requisitum. Hic unis literis plus est effecturus,  
 quam pomposa, ingentibus cum expensis, legatio. Conscribendum perbrevis si-  
 stet militem, apud quem concinna corporis forma, & gubernandi sagax dexte-  
 ritas tantam est conciliativa auctoritatem, ac si alter Achilles seu redivivus præ-  
 sto esset Arminius. Vultus divinitas, ex qua cum majestuosam gravitatem permixta,  
 clementissima elucescit civilitas, & comis generositas, bina regiminis fulcra, A-  
 morem videlicet & metum parturiret. Gravissimum patraretur delictum, ejus si  
 fidelitas in dubium vocaretur, imò fidelis esse cogeretur, si indigenatus, quo  
 quamplurimi indignissimi modo gaudent, afficeretur beneficio, bona enim sic  
 sua ceu vestra defendere teneretur, & Patriae, quia ei hic bene, immemor, Polo-  
 niam suam aram & focum agnitus. Hic omni alliciendus conamine, qui con-  
 silio & opere mirum in modum est adjuturus Sarmatiam. Cave, inquam, reicias  
 quod sit alienigena. Gallia prudentissimum & maximè fidelem Ministrum ha-  
 buit peregrinum. Peregrinis Ducibus suam obtinuit libertatem Batavia. Suecia  
 gens peregrinorum ope ad hoc gloriae conscendit fastigium. Cum fidelitate  
 prudentia cunctis in terrae oris naturalis est & indigena. Maximae virtutis ac ro-  
 boris res naturale extra solum suam edunt efficaciam. Flumina nunquam suam  
 exferunt virtutem, nisi sua ab origine procul, nec locupletant loca, nisi centum  
 circiter milliaribus sua à scaturigine distantia. Ignis & lumen quae hisce in sublun-  
 naribus inenarrabilia edunt opera Coelum suum appellant patrem. Quam mo-  
 vent extra sphaeram sunt naturae intelligentiae, & Angeli mundum qui custodiunt,  
 non hujus sunt mundi. Qui Patriae prodesse aptus, ille indigena censendus. Hic  
 coadjutor Regem si solatur, seros ad annos suam adhuc est extensurus vitam,  
 & Sarmatia pristinam est nactura gloriam, quam cordicitus non sine fervidissi-  
 mo zelo, Coeli à Numine precor. Caterum Te non fugiat, quæso, Serenissime,  
 Tibi imitationem Caroli Quinti, Philippi Secundi, Johannis Armeniae Regis,  
 Brigittae & Reginae Christinae nullo modo esse concessam, cum hi omnes heredi-  
 tariis suis resignarint Regnis, Tuum verò est electitium, quod prævio contra-  
 ctu es sortitus, ita ut tua dependeat resignatio binorum à voluntate. Vis Te tenet  
 obligationis cum vita finire regiminis actum. Reciproca stipulatione astringeris  
 scepro, nec illud deponere potes, nisi Te ignominia, ut Henricus Andegaven-  
 sis polluere amas, non consentiente toto Regno, quod Te nunquam est dimis-  
 surum. Fatum Te destinavit, ut, quia inquietum & maximè turbatum reperiisti  
 regnum, illud tranquillam relinquant. Fac modo silere Gallum, & sic factio En-  
 dymionis dormitura est somnum. Intestinam sopita discordiam, Scythias non diffi-  
 culter capistrum injici poterit. Turcae Borysthenes futura fatalis, vel Smolen-  
 scum



scum ut Magno olim Solimanno. Studeto Polonia ut negotia revirescant, & argentea aureaque eudatur moneta, sine qua nullum argentum sperandum seculum, quod bene scivere Romani, qui nullius ferè rei tantam curam ac solertiam habuere, quam probæ monetæ. Proba moneta semper felicis est indiciû regiminis, boniq; Principis. Hinc Hassiæ Landgravius Philippus, Principis auctoritatem cognosci & retineri tribus hisce notis dicere solitus est: Tuto itinere: Fide promissi: & proba moneta. Unde Carolus Magnus in Regio palatio monetam eudi voluit, exemplo Romanorum veterum, qui ἀργυρονεσιον Romæ in Junonis metalis templo habebat, nec Regibus Imperio subjectis jus monetæ fuit concessum, nisi singulari Imperatoris indultu, ut titulus decimus Chrysobullæ testatur, in qua Regi-Bohemix jus istud confirmatur. Polonia verò non erubescit privatis, nebulonibusq; privilegium illud locare, & ad quæstum prostituere. Corrigatis, obsecro, hoc vitium & Zygostatas constituatis, ut cum bona moneta Justitia & fœlicitas introducatur. In Prussia Urbes sua maneant facta tecta privilegia, nec militibus impiaque onerentur exactione. In hisce urbibus Poloniæ sita salus & libertatis firmamentum. Turpiter hactenus peccatum, quod Regiæ cohortes Thorunium, Elbingam & Mariæburgum sua in potestate habuerint. Si Rex contra jura Regni se Dominum absolutum reddere voluisset, nonne optimam viam habuisset, absolutum se nominans tot Urbium Dominum. Exemplo vobis sit Romanum Imperium, quod nunquam concessurum est Imperatori, liberis ut Civitatibus suum imponat militem. Quælibet sese defendat Civitas, fideles semper sunt futuræ, dummodo iis fidelis Polonia. Quid monstrosi affectûs perpererit Jacobini templi apud Thorunenſes prophana & injustissima ereptio, illi, quos cœca non prurit passio, sunt judicaturi. Millies deliquit Polonia, & sua in vitia cœca profusus est, quia fatum ipsi vicissitudinem imposuit, voluitq; ut ejus fortuna senescat, nec eodem stet loco. Jam satis infortunio litatum, satisq; cruoris Polonica prata bibere. Retro nunc respiciendum & respiscendum, abolitione Numinis Gallici, cujus maxima pars Idololatra fuit, & invectione salutiferæ concordix quæ brevi Regnum beatura. Plura subneſterem de miliris legendi ac sustentandi modo, infinitaque alia, sed differo donec videam hæc æqui bonique consulta, effectuique

data, consiliorum enim congeries absque effectu est mera ex arena pyramides struere. Cum voto Scipionis Censoris: *Dij*

*conservate. Remp. finio.*

Waremū-  
dus ab  
Eren-  
berg. de re-  
gni subsid.  
c. 5. n. 37.

Val. Max.  
4. l.

